

20  
21

# ISLA ((•)) ONLINE

Diahuebs 9 December 2021

Email: [IslaOnline@gobierno.aw](mailto:IslaOnline@gobierno.aw) Tel: 528-4952

Aruba mester di  
nos TUR!



Gabinete Wever - Croes II







## Durante Consejo di Minister na San Nicolas SEÑOR ALBERTO PERRET A PRESENTA UN PROYECTO DI HOTEL NA SAN NICOLAS



Desaroyo di San Nicolas ta keda prioridad pa Gabinete Wever-Croes. Durante e reunion di Consejo di Minister diamars ultimo na San Nicolas, diferente proyecto a keda presenta pa varios inversionista cu ta interesa den desaroya San Nicolas. Prome Minister Evelyn Wever-Croes a duna di conoce cu lo haci follow up riba e proyectonan aki, di cua ya algun a cuminsa caba.

Señor Alberto Perret a presenta un proyecto di hotel na San Nicolas y den su presentacion el a enfatisa e potencial di San Nicolas pa un proyecto di e magnitud aki.

"Nos ta sumamente contento pa a ricibi e invitacion pa ta presente durante di e Consejo di Minister na San Nicolas como un di e inversionistanan principal den e area, ta palabranan di sr. Alberto Perret.

Sr. Perret ta kere firmemente den e potencial di San Nicolas y den e tipo di bishitante/ turista cu ta desea otro actividad y experiencia durante nan bishita na Aruba cu ta diferente di lo cual tin na Merca. A base di e encuentro ta muestra cu tur cos ta bayendo den bon direccion pa inicia cu proceso pa re-desaroya San Nicolas.



Prome Minister ta gradici Sr. Perret pa kere den nos pais y den San Nicolas specialmente y inverti den nos economia y crea cupo di trabou tambe pa nos hendenan prome.

"Gabinete Wever-Croes ta demostra cu echanan cu San Nicolas ta importante enfocando principalmente riba e desaroyo pa San Nicolas den e mainta di Consejo di Minister. Desaroyo na San Nicolas ta necesario y importante pa henter nos pais", Prome Minister Evelyn Wever-Croes a expresa.



## Prome Minister Evelyn Wever-Croes: Durante e Prome Consejo di Minister pa Gabinete Wever-Croes II na San Nicolas

# VICTOR MARVAL Y GREG RAS A PRESENTA E PROYECTO SOCIAL Y DI AGRICULTURA, GREEN HOUSE



Durante e Prome Consejo di Minister pa Gabinete Wever-Croes II na Nicolaas Store na San Nicolas hunto San Nicolas Business Asociation (SNBA) varios inversionista interesa den e desaroyo pa San Nicolas a duna presentacionnan hopi interesante di proyectonan grandi, mediano y chikito cu sigur lo trece desaroyo hopi importante pa Aruba y pa San Nicolas principalmente. Prome Minister Evelyn Wever-Croes ta hopi impresionada cu tur proyecto cu a wordo presenta expresando cu Aruba tin potencial pa desaroya economia di nos pais.

Señor Victor Marval y señor Greg Ras a duna un presentacion di e proyecto Green House.

Green House ta un proyecto cu ta encera produccion di alimento manera fruta y berdura pa nos poblacion. E proyecto ta encera green houses, na spaño invernadero, unda cu por cultiva tomati, concomber, lechuga y tur otro berdura y fruta. Por haci esaki den un forma industrial sin uzo di hopi awa of tereno como lo haci esaki verticalmente.

Tereno ta algo cu ta limita riba e isla y mester produci bayendo den direccion ariba pa por produci suficiente. Pa e prome proyecto lo inicia cu 30 mil meter cuadra, cu posibilidad pa



expande, pues ta trata di casnan grandi. Haciendo e posibel pa alimenta un parti significativo di e poblacion di Aruba na un prijs hopi mas atractivo cu importa berdura.

"E presentacion di e proyecto na Ministernan a bay exitoso y tur cos a cana bon. Aworaki ta den espera pa haya e terenonan necesario di Gobierno, pa cuminsa e inversion cu ta uno significativo", Victor Marval di e proyecto Green House a duna di conoce.





# Durante Consejo di Minister na San Nicolas

## CHEF DARWING A PRESENTA UN PROYECTO HOPI INTERESANTE RIBA PROCESAMIENTO DI CUMINDA



Conhuntamente cu e grupo di San Nicolas Business Association (SNBA), Consejo di Minister a tuma luga na Nicolas Store diamars ultimo. Prome Minister Evelyn Wever-Croes a expresa cu e intencion ta pa Gabinete Wever-Croes II sigui cu e tradicion aki den e periodo di gobernacion nos dilanti. Tur Minister tawata presente na unda cu varios inversionista interesa den e desaroyo pa San Nicolas a duna presentacionnan hopi interesante di proyectonan grandi, mediano y chikito cu sigur lo trece desaroyo hopi importante pa Aruba y pa San Nicolas principalmente.


Chef Darwing a presenta un proyecto hopi interesante cu ta consisti di un planta di procesamiento di producto alimenticio manera: saus, vinaigrette y dressing. Un presentacion hopi amplio di e productonan cu e ta desaroyando.

'Mi ta sumamente contento cu e resultado di e reunion y reaccion di Gobierno. Ta spera cu tur cos sigui positivo, señor Darwing a expresa.'



Pa Gobierno di Aruba desaroyo na San Nicolas ta necesario y importante pa henter nos pais. E proyectonan cu a wordo presenta e diamars mainta ta sumamente interesante y tur ta prometedo pa trece desaroyo economico nobo, grandi y hopi interesante pa San Nicolas", Prome Minister Evelyn Wever-Croes a duna di conoce.





## MINISTER ARENDS A BISHITA DEPARTAMENTO DI AVIACION CIVIL




Diamars 7 di december, 2021, Minister Ursell Arends a haci un bishita oficial na Departamento di Aviacion Civil. Esaki den cuadro di dia Internacional di Aviacion Civil, pero tambe na ocasion di ambtenaarnan cu a hubila y/of bay cu pensioen.

Minister Arends a haya un recorrido amplio di e edificio di Directie Luchtvaart y por a sera conoci cu e personal presente den nan ambiente di trabou. Despues di esey a bay over na un ceremonia organisa especialmente pa e coleganan cu a hubila y/of bay cu pensioen. Hubilarionan: Bernadita (Judith) Koolman (35 aña), Simon van Eenennaam (25 aña), Danilo Vrolijk (30 aña), Anthony Kirchner (30 aña), Corine Martis (25 aña).

Tambe a tuma despedida di Rebecca (Ika) Paesch, kende a bay cu VUT. E personanan aki a wordo felicita y gradici door di Minister Arends. "Den nomber di Gobierno di Aruba mi kier gradici boso pa boso trabou y aporte durante boso añanan di servicio. Tambe mi kier a felicita tur e profesionalnan den e mundo di aviacion riba e dia di awe cu ta e dia Internacional di Aviacion Civil".







## MINISTER XIOMARA MADURO TA RECONOCE ANSELMO LEO VROLIJK PA SU 40 AÑA DEN MEDIA INFORMANDO Y EDUCANDO NOS COMUNIDAD



Diaranson mainta Minister di Cultura Xiomara Maduro a ricibi Sr. Anselmo "Leo" Vrolijk. Dia 1 di december ultimo Leo a cumpli 40 aña den mundo di media. Pa e motibo aki Minister Maduro a invita Leo pa ta presente na su despacho pa asina e mandatario por a brinde un merecido reconocimiento y gradicie pa su excelente trabaonan haci den e mundo di media pa asina nos comunidad ta bon informa y educa riba desaroyonan riba nos pais. Ademas pa dune danki pa su contribucion pa yuda documenta hechonan historico di nos pais.

Den presencia di su esposa y yiu Andrew Vrolijk, como tambe Minister President Evelyn Wever-Croes, director di Telearuba Giovanni Kock, ex-colega John Flemming y colega Robert Thijsen, Minister Xiomara Maduro den nomber di Gobierno di Aruba a entrega Sr. Leo Vrolijk un bunita plakaat cu ta bisa "Gobierno di Aruba: Reconocimiento na Anselmo "Leo" Vrolijk. Masha danki pa e excelente trabou y dedicacion cu bo a desplega durante 40 aña den media pa mantene nos pueblo bon informa", Minister di Finansa y Cultura, mr. Xiomara J. Maduro, Aruba, 1 di december 2021.

Tabata un rato hopi ameno caminda Leo a comparti algun experiencia di su trabao durante último 40 aña, como tambe Leo



a gradici Gobierno di Aruba, Minister President Evelyn Wever-Croes y Minister Xiomara Maduro pa e bunita reconocimiento na su persona.



# DIA 8 DI DECEMBER NOS TA RECORDA E 104 AÑA DI NATALICIO DI RUFO WEVER, MUSICO Y COMPOSITOR ARUBANO

Rufo Wever a nace na Oranjestad, Aruba, dia 8 di december 1917. Na edad di seis aña el a cuminsa haya les di piano. Poco tempo despues el a manifesta su talento musical excepcional. Dia Rufo tabatin mas o menos 15 aña di edad el a forma, hunto cu algun di su amigonan, e orkesta 'Melody Boys', cu a bira un gran sensacion riba su isla natal. Resumiendo por bisa cu Rufo a dedica henter su bida, esaki kieren mas di cincuenta aña, na e arte di musica.

Hopi ta e instrumentonan cu Rufo a siña toca bon. Entre otro guitarra, saxofon y clarinet, pero riba tur ta destaca Rufo su instrumento preferi: piano. Casi innumerabel ta melodiaran di diferente ritmo cu el a compone desde cu el a cumpli 18 aña. Su prome composicion ta e wals 'Arubanita', cu ta e unico pisa cu su Mahestad Reina Juliana a baila durante su bishita na e islanan di Antiya Hulandes na 1959. Semper Rufo a considera e evento aki como un honor hopi grandi.



Rufo ta co-compositor di e himno ARUBA DUSHI TERA.

Na edad di 24 aña Rufo a sufrí un accidente automobilístico lamentabel, den cual el a perde su man robes. Logicamente el a pensa cu nunca mas lo el a bolbe toca piano. Pero, inspira pa su gran amor pa musica, e mes a diseña algun tempo despues, un brasa artificial, cu cua el a logra vence su handicap di un manera asombroso. Cu su brasa nobo e tabata toca e notanan principal di baho riba e piano, asistiendo su man drechi di un manera sorprendentemente bon. Rufo a haci su reaparicion como pianista y a toca na television na Aruba, Corsou, Venezuela (Maracaibo), Costa Rica y Puerto Rico. El a graba varios L.P., disco 45 y 78 r.p.m., cu semper su amigonan y admiradonan a ricibi cu hopi entusiasmo. Na 1975 Rufo a ricibi di Reina Juliana, soberana di Reino

Hulandes, e condecoracion di 'Ridder in De Orde van Oranje Nassau'. Esaki tabata e distincion oficial mas halto entre e hopi homenahe cu Rufo a yega di ricibi como reconocimiento pa su contribucion na e herencia musical Arubano.

## Departamento di Impuesto ta informa: E FORMULARIO "VERZOEK VERMINDERING LOON 2022" TA OBTENIBEL ONLINE

Esaki ta valido solamente pa **vermindering-loon** empleadonan.

Mirando cu nos ta den porta di comienso di aña 2022, ta bon momento pa entrega e peticion "Verzoek vermindering loon". E peticion aki NO ta obligatorio. E empleado ta dicidi si e ta desea di entrega un peticion of no. Alabes ta posibel pa entrega e peticion den transcurso di aña 2022 tambe.

### KICO MESTER HACI?

E empleado ta entrega un peticion hunto cu e comprobantenan. Pa esaki e ta yena y firma e formulario "Verzoek vermindering loon 2022". Por baha e formulario via:

<https://www.impuesto.aw/particulier-formulieren-en-toelichtingen/>

Despues ta scan tur documento y manda nan pa nos online via:

<https://www.impuesto.aw/uw-digitale-formulieren-snel-invullen>

Scoge: Verzoek vermindering loon indienen

### CONDICIONNAN

"Verzoek vermindering loon" no ta aplicabel pa tur persona. Ta importante pa informa bo mes bon di e posibilidadnan y e condicionnan cu ta aplicabel.

Lesa mas: <https://www.impuesto.aw/verzoek-vermindering-loon>


Pa mas informacion por yama nos tambe na 522 7424.

Verzoek vermindering Loon  
www.impuesto.aw

Home • Particulier • Betalen en Teruggaaf • Verzoek vermindering Loon

Departamento di Impuesto





## TUI TA CUMINSA CU VUELONAN ENTRE BRUSSELS Y ARUBA



Diahuebs e aerolínea TUI a anuncia cu na April 2022 lo cuminsa cu vuelonan pa Aruba desde Brussels. E vuelo pa Aruba lo pasa via Santo Domingo, pero e vuelo di Aruba pa Brussels si lo ta uno directo.

E aerolínea TUI lo bay ofrece e servicio di 1 vuelo semanal riba diadomingo. E aerolínea lo ta uzando e tipo di avion Boeing 787-8 Dreamliner. E vuelo lo ta saliendo pa 9am y lo ta jegando Aruba 3.15pm ora local. E ida lo ta saliendo for di Aruba pa 4.05pm y lo baha na Brussels e siguiente dialuna mainta. E ruta aki no ta uno full nobo pa TUI, door cu den pasado ya caba e ruta aki tawata wordo uza.

E noticia aki ta uno sumamente positivo pa Aruba su turismo caminda lo bay diversifica e mercado Europeo cu 1 ruta nobo.

Di manera aki Aruba ta sigui reconstrui e mercado importante aki creando mas conectividad entre Aruba y Europa. E focus ta pa nos recupera nos turismo completo y tur esfuerzo ta dirigi riba esaki.

Minister Oduber ta sigui diversifica nos turismo y cu e vuelonan nobo aki ta percurando pa ehecuta e vision di diversificacion. Minister Oduber kier a gradici partnersnan AAA (Air Service Development) y ATA, y tambe tur otro partner pa e logro aki.





**Minister Dangui Oduber:**

# **CEO DI ARUBA AIRPORT AUTHORITY N.V. A PRESENTA E "MULTI ANNUAL CORPORATE STRATEGY" 2022-2026**



Diaranson Minister Dangui Oduber a reuni cu CEO di Aruba Airport Authority N.V. (AAA) Sr. Joost Meijs den cuadro di e presentacion di e "Multi Annual Corporate Strategy" 2022-2026 di AAA. Den e documento aki AAA ta delinea henter nan strategia y e direccion cu nan lo kier tumar durante e proximo 4 añanan pa por cumpli cu e ambicionnan cu nan tin como compania. Tambe pa muestra con den termino largo lo yega na e aspiracion final pa aña 2030.

Manera ta conoci aeropuerto ta trahando duro riba e proyecto di "Gateway 2030" cu ta un proyecto di expansion di nos aeropuerto. E proyecto aki ta hopi grandi den su totalidad y alaves importante pa Aruba su turismo, economia y e aeropuerto mes. AAA su meta ta pa sigui crese como compania dunando e mihor servicio awo, den futuro y den bon colaboracion cu tur nan empleadonan directo y tur stakeholder cu ta forma parti di aeropuerto.

Minister Dangui Oduber ta contento cu AAA ta sigui e vision y maneho di Ministerio di Turismo caminda e aspiracion nobo lo bay conforme e rekisitonan economico, ambiental y social pa por haci e diferencia di ta un aeropuerto mas sostenibel den



region di Latino America y Caribe.

Minister Dangui Oduber a keda masha satisfecho cu e presentacion cu e la ricibi di Sr. Meijs y ta hopi optimista pa cu e futuro di Aruba Airport Authority N.V. Un pabien sigur na e team di AAA cu ta trahando duro pa hiba nos turismo y Aruba pa dilanti. Aruba ta recuperando y aña 2022 ta muestra di ta un bon aña pa nos tur.





## Minister Geoffrey a reuni cu SER tocante "economia informal"

# ECONOMIA INFORMAL TIN IMPACTO DI 13% RIBA NOS PRDUCTO NACIONAL



Dialuna ultimo Minister di Asuntonan Economico, Comunicacion y Desaroyo Sostenibel, Geoffrey Wever den nomber di Gobierno di Aruba, a ricibi oficialmente for di presidente di Sociaal- Economische Raad, Sra. Tisa La Sorte, y e secretario general e conseho over di economia informal na Aruba.

Sociaal- Economische Raad como un organo consultativo independiente estableci pa ley, ta duna conseho na gobierno riba asuntonan di mayor importancia riba terenonan social y economico. Sociaal- Economische Raad ta conta cu representacion di organisacionnan di dunadornan di trabao y empleadonan y expertonan independiente.


Segun e conseho di Sociaal- Economische Raad, economia informal ta referi na actividadnan economico cu pa ley y practica no ta wordo regla na un manera formal. Ta trata di actividadnan economico cu no ta conta cu tur e permisonan necesario, no ta cumpli cu tur obligacionan fiscal y no ta

registra na instancianan gubernamental. Motibonan di eherce actividadnan economico na un manera informal ta varia, for di acceso na e mercado, te cu leynan existente.


E resultadonan preliminar ta indica cu e impacto di e economia informal ta wordo calcula na un averahe di 13% di e producto interno bruto over di e periodo 1990 pa 2019. Pa disminui actividadnan informal, Sociaal- Economsiche Raad ta recomenda intensiva supervision y control, hisa e sumanan di boet, cambio di belasting directo na indirecto y registracion obligatorio di esnan indocumenta.

Gobierno di Aruba conhuntamente cu Ministerio di Asuntonan Economico, Comunicacion y Desaroyo Sostenibel ta gradici Sociaal-Economische Raad pa e conseho over di economia informal. Basa riba e conseho y den liña cu maneho di Gobierno di Aruba, lo traha y implementa un plan di accion pa combati e economia informal.







MINISTER Endy Croes



# MINISTER DI ENSEÑANSA Y DEPORTE ENDY CROES TA GRADICI SRA. GLENNIE TROMP PA TUR TRABOUNAN EHERCE DURANTE MAS DI 40 AÑA DEN SEVICIO DI GOBIERNO

Diamars atardi Minister Endy Croes tabata presente na IMAX na Gloria pa un celebracion special na honor di sra. Glennie Tromp. Durante e ceremonia placentero y bunita a pasa den e trayectoria di sra. Glennie durante su 41 aña cu e la sirbi Gobierno y mas den e area di turismo. Sra. Glennie Tromp a traha pa Aruba den exterior y a termina su carera na Oficina di Turismo di Aruba. Sra. Glennie Tromp semper a sintie orguyoso pa traha y representa Aruba den exterior unda cu e la laga un stempel na Europa y Latino America como tambe na Aruba, un trahado ehemplar, hopi dedica, motiva y loyal na su trabou

Minister Endy Croes ta gradici p'e invitacion pa por a comparti un momento asina special pa sra. Glennie Tromp hunto cu tur su coleganan di ATA cu a prepara un excelente "Farewell STAR Celebration" pa sra. Glennie Tromp. E mandatario ta gradici sra. Glennie Tromp pa tur loke e la haci pa nos dushi Aruba y ta desea sra. Glennie Tromp tur cos bon y goza den un pensioen bon mereci!





# MINISTER DI ENSEÑANSA Y DEPORTE ENDY CROES A BISHITA FUNARI




Diaranson mainta Minister Endy Croes a haci un bishita di cortesía na Funari na Savaneta riba un invitación special. E Mandatario a wordo ricibi pa directora di Funari, sra. Lilia Bisslik- Mackay y cuatro stagaires di EPI; Anchell Statie, Anchella Jean Louis, Jodi- Ann Willems y Shamaya Arndell. Na yegada e Mandatario a pasa saluda e clientenan pa despues continua cu e reunion y presentacion. Actualmente Funari tin diesun cliente di diferente edad cu un of otro limitacion ta pasa dia for di mainta te merdia cuater biaha pa siman for di dialuna pa diahuebs. E clientenan ta pasa un mainta ameno yena cu diferente actividad.




Durante e bishita na Funari e mandatario a haya un recondo door di e luga, a tuma nota cu luga mester di basta atencion pa loke ta e mantencion di e edificio. Funari tin algun plannan pa future manera entre otro pa realoca y amplia e cushia, un gym y multifuncioneel ruimte. Minister Endy Croes a haya un presentacion di e proyectonan nobo cu un vision nobo cu Funari tin pa atrae mas cliente, mas voluntario y mas actividad interno y externo. E ta un bunita proyecto, hendenan cu curason na e luga corecto ta duna asina oportunidad na hendenan cu limitacion den cualkier forma desde hoben te cu un edad mas avansa por pasa dia na Funari.

E Mandatario a sigui bisa; cu nos a primiti di mira e peticionnan di Funari, proyectonan y lo percura pa di un of otro manera duna sosten den aña 2022 pa dilanti pa asina por yuda un poco cu e parti di mantencion y/of renobacion cu falta. Minister Endy Croes ta gradici Funari y e voluntarionan pa nan dedicacion y trabou inalcanzabel cu nan ta haci pa e comunidad di Aruba.







## Minister Glenbert Croes:

# A TRAVES DI FIRMAMENTO DI E ACUERDO DI LNG PRONTO ARUBA LO TA 'BACK ON TRACK'



Diahuebs a tuma luga un momento historico pa Aruba, Mandatarionan di Gobierno di Aruba tabata presente pa e ceremonia di firmamento di acuerdo di LNG entre WEB Aruba NV y Eagle LNG. Minister di Labor, Energia y Integracion Glenbert Croes a anuncia cu siguiyemente lo inicia negociacion cu Refineria di Aruba (RdA) pa e luga designa pa realisa e infraestructura di e facilidad pa ricibi LNG y tambe pa distribui esaki entre otro pa WEB.

'Despues di mira e caminda largo cu a cana y esfuerso di diferente Gobierno pa introduci energia mas limpi pa Aruba, finalmente e dia a yega unda cu e firmamento di acuerdo di "Gas supply" entre Eagle LNG y WEB Aruba NV ta tuma luga.' Como Minister di Energia sr. Croes a expresa di ta apoya e proyecto aki totalmente.

Mirando e historia di diferente esfuerso cu a wordo haci den pasado por mira bek na e proceso di ROI pa industria alternativa a cuminsa na 2019. Na e momento ey Minister President Evelyn Wever - Croes tabata Minister di energia pa cual a traves di e proceso encamina, Eagle LNG a sali e compania escogi. Cual a conduci na e momento historico cu a tuma luga.

E mandatario ta felicita Eagle LNG pa nan determinacion pa hunto yega na un acuerdo cu ta un win-win pa ambos partido. Pa conclui, Minister Croes a gradici presencia di coleganan Minister manera Minister di Husticia Rocco Tjon, Minister di Finanzas Xiomara Maduro, Minister di Enseñansa Endy Croes y tambe tur miembro di Parlamento y esnan di San Nicolas Business Association (SNBA).



# PABIEN ARUBA


cu e logro historico di  
**WEB Aruba NV y EAGLE LNG**

**UN ACUERDO CU LO:**

- haci nos menos dependiente di crudo
- lo uza energia mas limpi
- lo estabilisa prijs di awa y coriente
- lo trece mas desaroyo economico
- lo crea mas cupo di trabou



**Ministerio di Labor, Energia  
y Integracion**





## Departamento di Salud Publico: UPDATE 9 DI DECEMBER 2021

Segun resumen di awe 17 persona a recupera y un total di 26 caso nobo di COVID-19 a keda registra di cual 2 ta no-residente. E cifranan aki ta representa un 'Positivity rate' bou di nos residentenan di 16%.

E cantidad di casonan activo di COVID-19 pa awe ta 192 y cantidad di fayecidonan relaciona cu COVID-19 ta 176. Datos ta ilustra casonan nobo di COVID cu un average semanal di

20 caso pa dia y un averahe di 'positivity rate' semanal di 13% pa dia.

Actualmente na Aruba tin 7 persona interna debi na COVID di cual den ICU tin 4 persona y riba piso general tin 3. Na Colombia tin actualmente 7 persona den ICU y 1 riba piso general.

9/12/2021	TOTAL	RESIDENTE	NO-RESIDENTE
<b>Casonan Nobo</b>	<b>26</b>	<b>24</b>	<b>2</b>
Activo	192	162	30
<b>Recupera</b>	<b>16153</b>	<b>14567</b>	<b>1586</b>
Positivo	16531	14911	1620
<b>Morto</b>	<b>176</b>	<b>172</b>	<b>4</b>
Vacuna	83894	-	-
<b>Hospitalisa</b>	<b>7</b>	<b>-</b>	<b>-</b>
AUA			
ICU	11	-	-
AUA COL	4 7		

**HABITONAN PA KEDA**  
*Saludabel*  
DEN TEMPO DI COVID-19 Y VACUNACION

**Fiha orario di cada cuminda!**

Mantene un ordo den e cumindanan y fiha un ora pa cada un, lo yuda regula peso. Mantene un orario corecto di cuminda ta hopi importate pa mantene e metabolismo den perfecto condicion y activo 100x100. Tambe un bon rutina alimenticio ta constantemente yuda den e prevencion di numeroso trastorno di e organismo manera diabetes y algun malesa cardiovascular. Regula ora di cada cuminda pa asina mantene bo mes saludabel. Pa combati COVID-19 bo mester mantene bo salud y vacuna, ya cu ta comproba cu e vacuna tin un efectividad halto pa proteha bo y evita transmision. Ban uza tur e hermentnan cu nos tin pa caba cu e virus aki na nos isla!

**Ami SI ta vacuna!**

Mantene 1.5M minimo di distancia

Laba man frecuentemente

Uza tapa boca paden di tur luga

**VACUNA!**





*Un Feliz Dia*

**ISLA ONLINE**

NOTICIA DI GOBIERNO